

4% daplì a las cassas da malsauns

Reducziun tar ils medicaments

DA LUCAS DEPLAZES / ANR

■ **Per l'onn 2015 s'augmentan las premias per las cassas da malsauns en media per 4%. Quai munta per mintgin var 16 francs il mais daplì. Tranter ils chantuns datti grondas differenzas.** L'onn proxim pajain nus 4% daplì premias a las cassas da malsauns. Quai ha communitgà il minister da la sanadad publica, *Alain Berset*, a chaschun da sia conferenza annuala da medias ier a Berna. Tranter ils singuls chantuns varieschan las premias marcantamain. Il pli bler pajan l'auter onn ils abitants dal chantun Sutsilvania cun 6,8%; il pli pauc ils Bernais cun 2,7%. Per il Grischun ston ins quintar cun 4,1% daplì. En diesch chantuns pajan ins main che 4%, en tshintg chantuns passa 5%. Questas calculaziuns valan per persunas cun ina segirada da standard ed ina franchisa da 300 francs. La gronda part da las persunas preferescha dentant in auter model, che quai saja ina franchisa pli auta u ina rait da medis da chasa, cun restricziun da la libra schelta da medi.

Svilup marcant dals custs

Dapi l'introduziun da l'obligatori l'onn 1996 èn las premias s'augmentadas per var 90%, ellas èn quasi sa dubladas; ils ultims diesch onns per 36%. Ils motivs da l'augment massiv da las premias – che surpessan per lunsch la chareschia – na saja betg simpel da declerar, ha constatà Berset. Tschert che ils custs hajan influenzà il svilup demografic, cun l'uschenumnà «Babyboom» dals onns tschuncanta/sessanta da l'ultim tschientaner, il fatg che la populaziun viva oz pli ditg ed il schlargiament dal provediment medicinal en general. En mintga cas reflecteschan ils custs las prestaziuns medicinalas che nosa communitad ha pretendì. Las premias a las cassas da malsauns stoppian en tutta cas cumpensar ils custs, ha punctuà Berset. Quests na sajan betg adina lev da prevesair.

Repartiziun dals custs

Las premias vegnan impundidas per covrir ils divers custs per la sanadad publica. Da quels van 36,4% als ospitals, 21,3% als medis da chasa, 19,2% per ils medicaments,

5,8% a las chasas da tgira; 5% custa l'administraziun. Ils custs per ils ospitals surpiglian las cassas da malsauns (45%) ed ils chantuns (55%). Quella repartiziun entra en vigur l'onn 2017. Actualmain paja ina part dals chantuns ina cumpart sut ils 55%. Dapi l'onn 2013 pon ils chantuns influenzar meglier il svilup dals custs, saja quai cun planisar il provediment medicinal u cun decretar mesiras cunter in provediment surdimensionà sin lur territori. Divers studis naziunals ed internaziunals (OECD) han demussà che la Svizra ha in respectabel potenzial da spargn en il sector da la sanadad publica. Concret vegn fatg attent sin il grond dumber d'intervenziuns betg necessarias or dal puntg da vista da la sanadad. La Svizra metta en il pli grond dumber da protesas da chalun dals 20 pajais examinads. Grondas differenzas datti er tranter ils chantuns. Daco implantescha il chantun Glaruna 196 protesas da chalun, il chantun Giura dentant be 84 sin 100 000 abitants?

Medicaments

Sin il sector dals medicaments ha il departament gia realisà diversas reducziuns dals pretschs. Durant ils onns 2012/2013 ha l'Uffizi federal per la sanadad reduci il pretsch da var 1000 medicaments ed economisà var 200 milliuns francs l'onn. La proxima correctura è prevista per il mais da november 2014 e duai lubir da reducir ils pretschs per medicaments da var 600 milliuns francs ad onn. Berset ha fatg cumparegliaziuns cun noss pajais vischins ed el ha constatà en media ina differenza dals pretschs per ils medicaments da var 5% en disfavour da la Svizra. En intgins cas èn las differenzas dals pretschs dentant blier pli grondas.

Infurmaziun per mintgin

Fin ils 31 d'october 2014 ston infurmar las cassas da malsauns mintgin davart las novas premias ed als dar – durant il mais da november 2014 – la pussaivladad da midar la cassa u il model d'assicuranza. En l'assicuranza da basa èn tuttas cassas da malsauns obligadas da prender si mintga persuna, senza cundiziuns.

Ulteriuras infurmaziuns dat: tel. 031 322 95 05 u media@bag.admin.ch



Cusseglia federal Alain Berset a chaschun dalla conferenza da medias ier a Berna.